



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 3

West Ham nung Nuno Espirito
Santo coach kumogo

Hindu nunger yimsü lenir Swami
Chaitanyananda Saraswati puogo



VOL. XXII ISSUE NO. 346 (ADOK 346)

DIMAPUR

TENTONÜ (MONDAY)

RONGJUI (SEPTEMBER) 29, 2025

₹ 5.00

Nov 6 & 7 anogotem Nagaland World Music Festival amungtsü



Ketdangsertemi osangbenertem den jempidang
tangokba noksa angur

Kohima, September 28 (TYO): Kekhrie Krotho-i Task Force for Music & Arts (TaFMA) Nagaland den yaritepa 4 buba Nagaland World Music Festival ayongzüksü.

Iba benjung ya "Threads of Heritage" omen nung ajemdaker November 6 nungi 7 tashi Khuzama playground, Kohima district nung amungtsü.

Nagaland World Music Festival nung Thailand aser France-i country partners ama shilem agitsü aser Thailand, France, Myanmar, o Nepal nungia nisungtemi shilem agitsü.

Deobarnü Hotel Japfü, Kohima nung Chief Event Manager Nunese Sale-i iba osanglemsatep.

All Nagaland Open Folk Song & Fusion Competition asemben tashi ayongba sülen tang iba sentong ya ulushir Nagaland World Music Festival ta melener ta Sale-i ashi.

Iba benjungung nung Folk Song (Group) aser Folk Fusion (Group and Solo) telemsa nung tetoktepbatem alitsü.

Sempettem:

Folk Song (Group): Winner -

Rs 35,000; Runner-up - Rs 15,000

Folk Fusion (Group): Winner - Rs 35,000; Runner-up - Rs 15,000

Solo Folk Fusion: Winner - Rs 20,000; 2nd place - Rs 10,000; 3rd place - Rs 5,000

Maneni, Best Male aser Best Female participants nem sempettem agütsü.

November 6 nikongdang 3:00 ako nung benjung lapokba sentong nung Advisor to the Chief Minister of Nagaland Abu Metha-i shilem agitsü.

Iba sentong nung TaFMA Chairman Theja Meru aser L'Atelier de Joël Robuchon, Bangkok nug Executive Chef Olivier Limousin nati o jembitsü aser Thailand international singer & 2024 The Voice Thailand semi-finalist Kornkanok Lamomprom-i ken atentsü.

November 7 nü cultural show ka alitsü aser iba nung Nagaland nungi kin 17-i pei pei sobutsü agir shilem agitsüla. Iba atema first-come, first-served basis nung registrations agitsü ta tayongertemi metetdaksüogo.

Governor Bhalla-i Wokha aser Doyang semdang

Dimapur, September 28, 2025 (TYO): Nagaland Governor Ajay Kumar Bhalla-i September 27, 2025 nungi anogo ananü atema Wokha aser Doyang semdang.

Honibarnü Assam Rifles Camp, Wokha nung Governor Bhalla pelaa agizük aser pa nem Guard of Honour ka agütsü.

Governor Bhalla Doyang-i aodang Don Bosco Higher Secondary School, Wokha nung khen anenzüka liasü.

Doyang nung pai Doyang Hydroelectric Power Station semdang aser North Eastern Electric Power Corporation (NEEPCO) ketdangsürtem den ajurutepa senden ka amen.

Iba senden nung Head of Project, John Zeliang menden liasü aser Senior Manager (Civil), Zachamo Ovung-i presentation ka sayu.

Senior Manager (Civil)-i Doyang Hydroelectric Dam amenokba aser tongtipang temetetsütem lemsatep. NEEPCO-i infrastructure development, community

outreach, funding mechanisms, aser regional connectivity maparen inyakba osang paisa metetdaksü.

Governor Bhalla-i NEEPCO telok dang parnoki bendanga agüja inyakba atema tenüngsang agütsü.

Governor Bhalla den pa kinungtsü Jyoti Grover Bhalla dena lir. Yashi Wokha Deputy Commissioner Vineet Kumar IAS, Superintendent of Police Wokha, T. Relo Aye aser tanga tongti ketdangsürtemi Governor meina liasü.

Governor Bhalla-i yasüng Doyang nung yipzük aser tanü site visits senzüa liasü.

Taoba Nagaland Governor La Ganesan ajungbena asüba sülen August 2025 nungi Ajay Kumar Bhalla-i Nagaland Governor inyaksü tenzük.

Iba ya masüdang Bhalla-i Manipur Governor inyaka liasü. Paisa Union Home Secretary inyakba densema Indian Administrative Service nung mapa balala inyakogo.

Chakma kaketshirtemi PM Modi dangi shidi zülu

New Delhi, September 28, 2025 (Agencies): Bangladesh Army-i Bangladesh kübok Khagrachari nung Jumma nunger pezü tepsetba, nisung 50 tema yirutsüba aser yimtsüngtem ajunga rongdoktsüba aitsür ta All India Chakma Students' Union (AICSU)-i metetdaksü.

September 28 nü AICSU-i India Prime Minister dangi memorandum ka yokogo. Iba nung Chittagong Hill Tracts (CHT) nung tashiyim mapa inyakba atema tebang aitsü, teyari agütsü aser alimai ajitettsü ayongzükogo.

September 28 anepdang Bangladeshi sepaitemi Guimara nung timi lungkak aiterem dak injang khaloktsü. Iba sülen sepaitemi Ramsu Bazaar nung ki karpoka tur auya aser mi agi rongdoktsü ta Chakma nungeri ashir.

September 23 nü Singhinala yimtsüng nung arishi küm 12 tain

Marma school tanur ka dak tebur telok kati tashiyim agi shi nung medemba anema lungkak ait. Bangladesh Army-i aibelenertem aputsü melena kaketshir lennirtem apu, lungkak aitertemi reshikangshi aser teloki ozüng alema inyaksü ajungmeso ta parnokisa ashi.

"Iba ya ozüng amba mapa masü saka sorkari yaria kin ka samatsütsü merangba lir. CHT nung Jumma nunger anema mapa inyakba nung nisungtem tepseter, tashiyim agi raksatsür aser mi senoktsür" ta AICSU President Drishyamuni Chakma-i ashi.

January 2025 nungi Jumma tetsür 29 tashi army aser iba tesem nung alirtemi tashiyim agi shi nung medemba, züka merenshiba mesüra reshikangshiba atalokogo.

May 5, 2025 nü Khiyang tsür Chingma Khiyang (29) dak tebur telok kati tashiyim agi shi nung medem aser Thanchi, Bandarban nung tepset saka iba atema

bushisüngdang kecha maliasü.

Student activist Ukyunu Marma dena lisopur lennirtem pur tepuokdak lir aser parnoki temeten meshiba atema reshikangshir.

AICSU-i India Prime Minister dang Bangladeshi envoy ajatsü, Bangladesh den tesentaktep pilatsü aser fact-finding mission ka yoktsü mepishiogo.

Parnokisa United Nations aser global human rights teloktemi meimchir anema mapa inyakba ken o tem bushisüngdangtsü akhanger.

Bangladesh kübok Chittagong Hill Tracts (CHT) nung lisopur million 2 jungnüa lir aser parnok ya India kübok Northeast den sobaliba aser tetsütebou mapang nungi sendaktepa lir.

Bangladesh army-i counter-insurgency operations tenüng amer kin ka samatsütsü meranger ta AICSU-isa metetdaksüogo.

100 Aspirational Agricultural Districts nung Mon adener

Dimapur, September 28, 2025 (TYO): Union Budget 2025-26 nung Prime Minister Dhan Dhaanya Krishi Yojana (PMDKYT) kübok küm trok tsüngda India nung Aspirational Agricultural Districts 100 renlok daksütsü metetdakja lir aser iba nung Nagaland nungia Mon district züngsemogo.

Iba ya 2025-26 financial year nungi tenzüksü aser Union Cabinet-i July 16, 2025 nü PMDDKY agizükogo ta Union Minister of Agriculture and Farmers' Welfare Shivraj Singh Chouhan-i Nagaland MP S Supongmeren Jamir dangi shidi ka nung metetdaksü.

PMDDKY ya October 2025

nungi tenzüksü aser iba atema agriculture aspirational districts 100 shimtetogo. Iba ya low crop productivity, low cropping intensity, aser less short term credit nung ajemdaker shimtem aser Nagaland nunga Mon district shimtetogo ta Union Minister Chouhan-i ashi.

PMDDKY atema shimtetba district tem nung Department of Agriculture & Farmers Welfare (DA&FW) aser tanga allied Ministries Department tem den schemes ajak ka akümsü ta paisa metetdaksü.

Iba scheme tajungtiba nung inyaka aotsü atema District, State aser National level nung ludentem

tentetsü. District Committee ji District Commissioner kübok asütsü aser parnoki sendaktepa alirtem den asüngdangtepa district action plan yanglutsü. District nung iba scheme ya Key Performance Indicators (KPI) aliba dashboard ka ajanga reprangtsü.

"Nü lenisüba kübok district ketdangsürtemi Nagaland nung PMDDKY maparen shitak inyaka aotsü imlar aser iba dak sendakba nung Department of Agriculture & Farmers Welfare-i state ajak nung Chief Secretary dangi temetetsütem yokogo" ta Union Minister Chouhan-i MP Supongmeren dang shidi nungsa ashi.

Tanü tebur lokti ajak nung tetsür maden majung ta angateta arudar: Wt. Sademmongla

Mokokchung, 28th September: Koba lokti nung tetsür nem jenjang shitak aser tajung agütsür, iba lokti lirumedema alitsü. Tetsü tajung, kinungtsü tajung yimsüsüba ajanga alima tajungji yanglutet. Tanü yimsüsüba nung tetsür shilem koda tongtibang lir. Iba o ya Dimapur nung alir Retd. DEO, Wt. Sademmongla-i 4 buba Khensatsür Shisatokden senden omen "Südem Akangshiro" dak rangloker "Yimsüsübaren nung tetsür shilem" onük nung jembidang metetdaksü. Laisa Napoleon-i ashiba o ka atishia, "Kü nem tetsü tajung ka agüjang aser ni nenok nem alima tajung agütsüdi", ta ashi.

Yimsüsübaren ta kodang südir asenok ajaki jet ta dang Minister, MLA dak tama rangloker. Iba den putu menden

aser yimden yimsüsüba nung, ano tentet balala lenirtem parnok dang ta aiben bilemer. Saka ibai asen kibong nungi tenzük loktiliba yimsüsübaren nung tetsürtemi koma shilem agir aser agütsüla iba dak rangloker asadangtsü junger, ta lai ashi.

Tanü alima ajunga nung tetsür tashi, tetsürtem temeten, tetsür jenjang ajungkettsüla, tetsürtemi yimsüsüba nung shilem agütsüla/ agütsütsüla, tetsür-tebur jenjang kasa asütsüla, tetsür jenjang ajungkettsüla, teburtemi amokbanga aliba yimden, lokti, tamangbaren ajak nung kasa shilem agütsütsü tetsürtem tejakleni arutsüla, tetsürtem jara 4 (four walls) nungi dangbo malitsüla ta ayimtenba mapang ka. Tanü na shiba südir süang, na tetsür ka, tetsü ka, kinungtsü ka, jala ka, "ana yimsüsür tajung kaka asütsü alimai akanger", ta

laisa metetdaksü.

Tanü yimsüsüba nung tetsür shilem koda tongtibang ta onük kar benokdang, mezüngbuba nung kibong indang ashi. Lipok kaket nung Tsüngremi tebur asoshi tetsür kaji teyarir yanglu. Aiben asenoki tebur yarir (helper) ka amai jembir. Saka alima yimsüsür ajaki shisanungiter (Advisor) teti ayur aser mapa ajak nung yaritepa shisa agitepa inyaker. Kechiaser tetsür aser teburji kasasa shilem agirtem lir (equal partners) aser pei pei shilem agi kadi ka abensatsür (equal partners with different roles and compliments each other). Yamaji, asenok tetsüttemji kibong ka nung shisa agütsür ka ama lir, yangi asen tetsür yimsüsüba maparen nung shilem tulu lir, ta laisa tatishitsü kar bener arua lemsatep.

(Maneni tapak 2 nung...)

Miss Wokha 2025 atema auditions tenzükogo



Miss Wokha 2025 atema September 27, 2025 nü Dimapur audition agidang tangokba noksa ka yangi angur.

Kohima, Rongjui/Sept. 28 (TYO): Miss Wokha 2025 korang asoshi toktepa maparen tenzuka Kohima aser Wokha nung September 20 aser Dimapur nung September 27 nü audition agia liasü.

Dimapur nungi nisung 15-i shilem agiba nungi iba

tetoktepa nung shilem agitsü nisung pongu shimogo, koba November ita grand finale alitsü.

Dimapur nungi contestants pongu ya Grace Kikon, Louchumi K. Lotha, Nzanti Odyuo, Ethungbeni Patton aser Rhonbeni Kikon alitsü.

IFM, Dimapur nung agiba

nung tetendanger tem ya Etsibeni, Yanbeni N. Shitio aser Zaben Murry nungertem liasü.

Thungbeni Kikon, Event Director, Miss Wokha 2025 ketdangsüba nung iba sentong agia liasü, kong audition ya Dimapur Lotha Students' Union-i sponsor süa liasü.

Pfutsero nung shisaluyim tajung indang seminar ayongzük

Dimapur, Rongjui/Sept. 28 (TYO): Chakhesang Scholars' Forum (CSF) ajanga Chakhesang Public Organisation (CPO) den lungjemer 'Quality education in Chakhesang areas: focus on elementary level' indang seminar ka September 27, 2025 nü Pioneers Complex conference hall, Chakhesang Baptist Church Council (CBCC) Mission Centre, Pfutsero nung ayongzuka liasü.

Iba sentong nung shisalen sayur ya Gauhati High Court, Kohima Bench nung advocate, Dr. Povotso Lohe aser United College of Theology and Mission indang tir Rev. Dr. Phuveyi Dozo liasü.

Iba seminar ya phase tasembuba aser tatembangba alitsü, aser kasa onük nung seminar ana taoba küm Phek aser Kohima nung agiogo.

Region nung primary level nung tali temulung agüja kakat reju shisaluyim tajungba

kumdaktsütsü asoshi angatetsü mechi Chakhesang nung shisashir, tashi-temeteter, teshisadanger aser tesayur tem nungi shisatsü lemsateptsü nükjidong nung iba seminar ya aka, ta CSF mendenpuba Dr. Zavise Rume-i ashi.

CPO treasurer Wepekha Wetsah-i Chakhesang nung zünger mapa mangu aliba tebilemstü lemsatep aser iba tebilemstü asoshi kanga junga jembishinü akatsü ajungshia liasü.

Paisa pei maitsü wazüka ayutsü aser kidang pei oshi jembitsü nungdakba indanga lemsatepa liasü.

Dr. Povotso Lohe-i primary levels nung shisaluyim tajungba kumdaktsütsü asoshi yimya balala amshitsü nungdakba tuteta ashi.

Shisaluyim ajungtsü asoshi sayuba, ki o jen, angazükba nung amshiba ajungtsü nungdaker, ta Lohe-i ashi.

Rev. Dr. Phuveyi Dozo-i jembidang, shisaluyim ajungtsü asoshi tesayur temi bendanga agütsütsüla, tesayur-tsüabor tesendaktep takang alitsüla, mapa dak ranglokba shisaluyim asütsüla aser tesayuba yimya tasen amshitsüla, ta ashi.

Christian Mission Higher Secondary School Phek nung mentor Sheveto Vese, Department of History and Archaeology, NU nung PhD research scholar Joseph Lohe, retired senior SDEO Akole Sami nung temi Phek, Chozuba aser Pfutsero nung education system indang lemsatepa liasü.

Dr. Tsutshowe-ü Sekhamo, CSF secretary of Academic and Journal Publications aser CSF general secretary Dr. Gideon Phesao nati Chakhesang areas nung school education indang statistics osang agüja liasü.

Iba sentong nung tesayur, lenirtem, scholars aser kakatshirtem dena liasü.

KPC & DPC-i asükhu lemsatep

Dimapur, Rongjui/Sept. 28 (TYO): The Morung Express nung osangbener Samuel Seb Rengma tebu Khemtsa Seb Rengma asüba osang angazüka kanga jashir, shiba Eden Hospital Dimapur nung September 28, 2025 nü asü, ta Kohima Press Club sangdong ka ajanga ashi.

Mangyimer kibong den asükhu lemsatep aser parnok nem tashi, tasü tait mulungsentsü aser tesunep agüjang aser asür tanüla tesunep nung anisüngzükjang ta sarasademtsür, ta DPC sangdong ajangasa ashi.

ta Kohima Press Club sangdong ajangasa ashi.

The Morung Express nung video journalist Samuel Seb Rengma tebu Khemtsa Seb Rengma asüba angazüka kanga jashir, ta Dimapur Press Club-ia sangdong ka nung ashi.

Samuel aser par kinungertem den onoki asükhu lemsatep. Iba mangyimba mapang parnok nem tashi agüjang aser asür tanüla tetem maka tesunep nung anisüngzükjang ta sarasademtsür, ta DPC sangdong ajangasa ashi.

Dzükou Valley nung senzusemponger atema metetdaksür

Dimapur, Rongjui/Sept. 28 (TYO): October 1 nungi tenzuka Dzükou Valley nung südoksünema tetsüng agi senzürtem (trekkers) asoshi Southern Angami Youth Organisation (SAYO) ajanga ozüng tasen sangdonga tejangja local guides anir senzütsü aser nikongdang 3:00 ako sülen senzütsü memelar.

Len sayurtem mali trekkers tem aiben lenmang samaba mesüra lenmang nung anendakba tali akumba mechi iba mera ya agir, ta SAYO ajanga ashi.

Par volunteers tem aiben aonung menur aser anepbongi rescue operations inyaka rongsen jenti laluba den timtem ajuruba lir, ta ashi.

Iba ama atalokba nungi jenbutsü aser iba tesem semdangertem kumzuka ayutsü mechi SAYO ajanga totuyuba kar agütsüogo.

Dzükou Valley telungi maidang trekkers ajungai SAYO registered local guide taa agütsür anitsüla, nikongdang 3:00 ako sülen Dzükou Valley nungi mesüra leni aotsü khenyongi memelatsü aser aibelener nem SAYO ozüng nung aliba ama merenshitsü, ta ashi.

Dzükou Valley semdangertem kumzuka ayutsü aser iba libak wazüka ayutsü mechi iba mera agir, anungji ajaki ozüng tasenba sülen anidaktsü ajungshir, ta SAYO sangdong ajangasa ashi.



Jubilee Memorial College, Mokokchung nung September 26, 2025 nü "A Cultural Odyssey" sentong ayongzuka liasü, kong akhi alemli mapang amshiba yimya balala den tanü-asüng yimya meyoktepa, talisa aben-süoshi süboyim, tsüngsangba, sorochiokba aser tsük asenba aser asepa nung toktepa liasü.

Tanü tebur lokti ajak nung tetsür maden majung ta angateta...

(TAPAK1 NUNGI...)



Wt. Sademmongla

Mosa tetsüi tenoktangba jenti liaka lar kibong alima putu nem bendanga magütsü. Tanü putu tensa nem tongloktsür chirnur mazuoktetba tetsütem aika lir. Ya asen yimsüsüba nung tamakok ka lir. Tat. kar - LGBTQ+, mojing külemba, phone ajanga taküm raksaba, asen tetsü oshi kibong nung mejembiba. Tetsü oshi mejembiba tebilemstü ya yimtsüng nungbo malitsü akok, saka tanga jila nungbo ibai

tebilemstü tulu. "Onokbo iba yagi tongogo, anungji, asen kibong yimsüsübaren nung südem akangshitsü kanga nungdaker", ta laisa shisem.

Tanü alima raraba, ochi mashi, telungjem maliba ajanga teraksa agi sünga lir. Ya ajak kibong ka nungi adokba nisungtemi inyaker. Yangi asen kibong akangshitsü nungdaker. Tsüngrem metetba aser Pa nungi shisatsü agiba tetsü kadi dang chirnur aser kinungbu nem shisa tajung agütsütet aser iba ajanga alima teraksaji yanglutet, ta laisa ayongzük.

Tanabuba nung, kibong nung rongsen ketdangsüba ya lir. Lai iba indang rasadang, tanü tetsürtem aika rongsen tsütsü tebur dak metaloka malir, pei sasa inyakteteba taküm, ya sarkar mapa nung alirtem masü, women entrepreneur aika adokdar aser iba yagi kibong rongsen ketdangsüba (budget)

nung shilem tulu agir, aser iba ajanga kibong ajungketer. Ibai tongtibang ta tetsürtemi angateta inyaktsü nungdak, ta ashi. Ano kibong aika nung tetsüri rongsen timi ketdangsüba masüba ajanga kibong telungi aluba lir, ta laisa shisem. Asenoki aiben senmangtsümang indang jembir, asen tetsü tebou senmangji koma liasü yamaji dang aotsü, saka kibong kümer, apuani-i bendenba ali rongsenjibo asen jalatem nema lezmüksütsü asen tetsütem teinyaktsü shilem tulu lir, ta laisa ashi.

Tasembuba nung, yimden yimsüsüba nung tetsür shilem indang lemsatepdang, lokti senden, yim mungdang, senso mungdang, putu menden amala nung tetsür adentsü aser shilem mali, aji asen otsüla oboula nung mapang nungi inyaka aruba aser tanü tashi yamaji inyakdar. Saka lenir/yimsüsür


kinungbur aika kinungtsü/tetsü shisa agia yimsü asüba otsütem lir, ta Obendanger 4:8, Deborah aser Barak na otsü atishia ashi. "Yamaji tanü tasutait aser shisa taka tetsür alimai nungdaker", ta laisa shisem.

Democracy yimsüsübaren nung tashi tulutibaji "vote" agütsüba temeten ya lir. Yangi nai/ni koma shilem agir? Tanü asen yimtsüng nung makaba aser nungdakabaji political leader lir. Ibai akatsü asoshi asenok tetsütem teinyaktsü shilem kar, ta laisa shisadangtsü olen ka ashi. "Na/ni tetsur ka, asen ayak (identity) aser asen temeten angateta aliba tetsür kaka asütsü nungdaker, alima ainba den tsüngkang medema otetba tetsür kadi dang yimsüsübaren nung shilem tajung agiteter", ta lai shisem.

Asen sasa asoa bilemba, sobaliba aser jembishinü agi tetsür jenjang makai

kumdaktsüba kar; Tat. Agi, "tetsürji jibilang aser süngolanga memeyong", "ajemajema liang", iba ya kokteta litettsü mapang tongogo. Tanü alima aika nung tetsürtem yimsüsüba meteta odaki. Kechiyong, tetsüri temeim aser anepalu, taitoktetba, telungjem agi yimsü asür. Tanü loktiliba nung reprangra joko tebur lokti ajak nung tetsür maden majung ta angateta arur, ta lai ashi. ULB nung tetsür nem shilem 33% agütsüogo, aser Nagaland Legislative Assembly nunga tetsür adokogo aser kopi meli-i NLA nunga 33% Women Reservation agütsütsü mapang arutsü. VDB ama, tamangbaren nung tetsürtem nem Rev. aser tongti shilem agütsür. Anungji, asenok ajak tasütait tetsür kaka, alima ainba den lirumedemtetba, pei ayak jangja-a metetba aser Tsüngrem den jajaba tetsü kaka asütsü, laisa ayongzük.

Karur nung TVK nüboyim sentong ka nung nisung 40 ajemset



New Delhi, Rongjui/ September 28 (Agencies): Honibarnü Tamil Nadu kübok Karur nung TVK party sentong ka nung nisung 40 ajemsetba sülen Amongnü Vijay-i aniba TVK party-i Madras High Court nung Justice, M Dhandapani dang iba tatalokba bushisüngdangtsü atema CBI mesüra Special Investigation Team nem agüjang, ta mepishi.

TVK advocates wing president, S Arivazhagan, Justice M Dhandapani'er kidangi tsüngdong oa pa ajurua

iba temepishibaji agütsü.

Osangbenertem den jembidang TVK deputy general secretary, Nirmal Kumar-i, iba tatalokba ken o jungjunga bushisüngdangtsü atema high court bench ajurua mepishio, ta ashi.

TVK party lenir Nirmal Kumar-i, High Court nung judge-i advocate tem dang Madras High Court Madurai Bench nem iba temepishibaji agüjang, iba sülen Hombarnü nikongdang 2:15 ako nung iba ken oji angadangtsü ta shio, ta metetdaksü.

Amongnü Tamil Nadu Health Secretary P Senthil Kumar-i, iba tatalokba nung nisung 39 asü aser nisung 67 yirua hospital nung treatment agidar, ta metetdaksü.

"Iba ama tia maka tatalokba nung nisung 39 süogo-asürtem rongnung tetsür 17, tebur 13, tebur chanu pezü aser tetsür chanu pongu densema liasü. Asür 39 nungjagi tasü mang 30 bo postmortem agiogo aser tasü mangji parnok kinüngertem ket nung agütsüogo," ta Senthil Kumar-i metetdaksü.

Oct 4-5 anogotem nung CEC Gyanesh Kumar-i Bihar semdangtsü

New Delhi, September 28 (Agencies): October 4-5 anogotem nung Chief Election Commissioner (CEC), Gyanesh Kumar den Election Commissioners ana- Sukhbir Singh Sandhu aser Vivek Joshi nungeri Bihar semdanga assembly elections agitsü atema terenemshiba jenjang asadangtsü, ta Amongnü ketdangsertemi metetdaksü.

Bihar nung Special Intensive Revision (SIR) mapatong kübok agiba final electoral roll September 30 nü sangdongtsü.

Assembly menden 243 aliba assembly kümsük November 22 nü tembangtsü.

Election Commission (EC) team jagi state election commission nung tongti ketdangsertem den senden

mena administrative, security aser election dak sendakba maparen balala asadangtsü, ta kasa osang ajanga metetdaksü.

EC team ji tanaben Delhi-i meyipa aoba sülen anogo ishika tsüngda Bihar nung election agitsü anogotem sangdongtsü.

Taoba mapang Bihar nung election shilem asem-pezü lemsar agia aruba ama taruba election-a shilem ishika lemsar agitsü.

Benjung mongpu atongba den külemi Bihar election ya Diwali aser Chhath benjung mapang ka nung agitsü, anungji voters teimtibai shilem agitetsüsa EC-i sentong renemtsü.

2020 küm Bihar Assembly elections shilem asem lemsar- October 28, November 3 aser

November 7 anogotem nung agiba sülen November 10 nü vote zünga election osang sangdonga liasü. 2015 küm nung Bihar elections shilem pongu lemsar October 12 nungi November 5 tsüngda agia liasü.

2010 küm nungbo Bihar assembly elections shilem trok lemsar agi. October 21 nungi tenzüka shilem trok lemsar election agia November 20 nü tembanga liasü.

2005 küm February ita nunga Bihar nung shilem asem lemsar election agi aser kasa küm October ita nunga shilem asem lemsar election agia liasü.

CEC-i Bihar semdangba sülen October ita tetenzüklen Bihar elections agitsü atema sangdong agütsütsü, ta ketdangsertemisa metetdaksü.

UNGA senden aliba mapang Jaishankar-i UN Secretary General ajuru

New Delhi, September 28 (Agencies): New York nung 80buba United Nations General Assembly (UNGA) senden aliba mapang nung External Affairs Minister, S Jaishankar-i UN Secretary-General, Antonio Guterres densema linük balala nungi lenirtem ajuruogo.

Jaishankar-i Algeria Foreign Minister Ahmed Attaf-a ajuruogo. Lenir anati India aser Algeria na tsüngda tesendaktep tajungba akümtsü atema jembia liasü, iba dak alia tenati Middle East tensa dak sendakba nung tebilemba lemsatép.

Jaishankar-i Saudi Arabia Foreign Minister Prince Faisal bin Farhan-a ajuru. Tenati linük ana tesendaktep aser region nung tensa mejungi aliba atema o lemtepa liasü.

Jaishankar-i United Nations General Assembly Tir, Annalena Baerbock-a ajurua liasü.

80buba UNGA senden nung jembidang Jaishankar-i, Bharat-i teti pei melungba ama inyaksü aser maneni Global South atema ola adoktsü, ta metetdakja liasü.

Pakistan aija Jaishankar-i, iba linük ya alima nung

kiralongraba tiyongtsü lir, ta ashi.

"Nüchiso anguba mapang nungi tenzüka India-i iba tayongzükba (kiralongra) anema rarar, kechiyong kidanger linük ya alima nung kiralongra adokdaksüba tiyongtsü tesem lir. Tesüba küm aika tsüngda alima nung kiralongra tatalokba tongti aika iba linük nungjagi inyakba lir. UN-i sangdongba kiralongrartemji par sensotem lir. Tang tesüsa tatitshitsü tulutibaji taküm April ita nung Pahalgam nung tai maket kiralongrartem jenti tepsetba tatalokba ya lir," ta Jaishankar-i metetdaksü.

Alima linüktemi longjemer kiralongra anema raratsüla, ta shia pai, "Kodang linüktemi yimjak nung kiralongra ya pei linük inyakyim ka, ta sangdongdir mesüra pei linük nung kiralongrartem jenokdaksüra item linükji ajaki longjemer aitsütsüla," ta metetdaksü.

Paisa kiralongrartem senotsü lenmang nokdangtsü aser kiralongrartem anema tenokdangba benoktsü ayongzük.

Hindu nunger yimsü lenir Swami Chaitanyananda Saraswati puogo



New Delhi, September 28 (Agencies): Delhi nung Hindu nunger yimsü lenir, Swami Chaitanyananda Saraswati-i tesüiba anogo ishika jenshia senzüba sülen Amongnü anepdang züngia 3:30 ako meta Agra nung aliba hotel ka nung lia puogo.

Saraswati ya taoba mapang management institute ka nung Director liasü. Amongnü police-i pa apuba sülen Delhi court kati pa anogo pongunü police ket nung ayutsü tetuyuba agütsü.

Arrshi küm 62, Swami Chaitanyananda Saraswati ya Delhi nung aliba Sri Sharada Institute of Indian Management-Research nung Director inyaka liasü.

Economic weaker section (EWS) scholarship agia iba Institute nungji azünger tetsür 17-i Saraswati-i tashishitsü o jembi, tim mesüi kongshi aser phone ajanga tashishitsü message yoka liasü, ta pa nem tai tongloksüba sülen nungi pa jenshia senzüa liasü.

Iba institute nung azüngertem tetsür aikati pa nem tai tongloksüba sülen Sri Sringeri Math administration-i pa Director menden nungi anentsü aser linük nungi jena

moudaktsütsü atema police-i 'Look-Out Notice' sangdonga liasü.

Pa anema benokba FIR nung shia aliba agi, pai ayaterm nung tetsür student tem dang pa takdangi arung ta metetdakja liasü aser phone ajanga tashishitsü messages yoka liasü.

Amongnü Delhi Police-i pa anema Arlla 351(3) kübok ken o benokogo. Iba Arlla nung amokmerenba aser yirutsütsü mesüra tepsettsüsa inyaksangshiba metetdakja lir, aser iba Arlla kübok aibelenertem bail nung chioktsü makok.

Hokolbarnü Sringeri Math aser police-a court dang, FIR nungji senotsü nung ochimashiba densema lir, kechiyong pai bank nungi Institution Trust indang sen lakh 55 agizüker ajen, aser tenüng ka amshia taila passport ka renem, ta metetdakja liasü.

Yaküm December ita nung agiba audit ajanga-a Peetham (Sri Sri Jagadguru Shankaracharya Mahasamsthanaam Dakshinamnaya Sri Sharada Peetham, Sringeri) nung senotsü dak sendakba ochimashi tulu aliba bushiteta liasü.

2010 küm pai Sri Sharada Institute of Indian Management Research Foundation Trust tenüng amshia Trust ka tenteta liasü. AICTE-i agizükba Trust ji Sri Sharada Institute of Indian Management Research lir.

Pai Peetham indang sen crore 20 shi Sri Sharada Institute of Indian Management Research Foundation Trust dangi 'transfer' süa liasü.



Srinagar, September 28, 2025: World Health Day anogomong amongtsü anogo ka lia Amongnü Srinagar nung aliba Dal awatsüng nung telok kati jelia World Heart Day nüngtem nung shilem agiba noksa nung angur.



TIR YIMYIM YIMOBILEM (EDITRIAL)

DIMAPUR MONDAY, SEPTEMBER (RONGJUI) 29, 2025

NPGs-ibo mekoktettsü !

Tanü Naga nung asoshi shisabolutsü tulutibaji Naga yimten nüchiso bushir, Naga Political Group-temi Naga yimten nüchiso bushiba tongpang nung tamakok angutsüba ya asütsü, kechiyong Naga nung yimten nüchiso bushirtem asoshi ibai longjemshir tongpang nung nokdakba mapang masü saka tongpang nung temulung melemtep adoka lemsaba mapang lir, anungji Naga Political Groups (NPGs) rongnungibo shingaia Naga yimten bushiba tongpang nung ya takok mangutsü. Ajisüaka, papiga ya nisung taküm dena paikato tenla agüja rarar tongpang nungi ajentsüa masü aser tangar tsüngdang alimaia ngua teka metongtsüa masü. Aji oda, tongpang nung takok mangutsüa ta temetet ser raratsübaji tongpang nung nokdaka alirtem asoshi dang masü saka nübortem ajak asoshi tezüdangtsüka, amajok nung mapang, nübo aser rongsen endokba mapa ka lir. Ibayongji, joko asenok Naga nungertem Naga yimten nüchiso asoshi raraba tongpang tuluba yutsür, asenok o asenok na rongnung temaba, tuluba aser takarba asütsü toktepba tongpang rara ka ama dang Naga yimten nüchiso asoshi raraba tongpang ya kümogo. Aji oda, asenoki asenok yimten jenjang temeja ka melatettetsüsa akümba ya khen khen British nung dang, khen khen India nung dang aser khen khen Myanmar (Burma) nungertem dang aser ano khenkhenbo Naga nung lenirtem dang tonglokja aruogo. Ajisüaka, tangbo asenok yimten tebilemtsü tuluba küma aoba ya tangar dang atongtsüla masü saka asenoksasa asenok aitsütsüsa kümogo. Ibaji kodang asenoki 'hau onoka tai-a' ta shitetdir, iba anogojang ano asenok asentenshir Naga yimten nüchiso asoshi nokdakba anogo asütsü. Aji oda, Naga nungertem yabo tangar bendanger yimten temzüng ozüng talenba kübok melii Naga nung dak apet yimten temzüng ozüng aser sobaliba temeja ka kübok Naga nungertema alima kintem rongnung, tila ka dang süaka, balaka alitsüla ta tangatetba arur joko küm noklang ka jungogo. Iba tangatetba nung amendaker Naga yimten jenjang balaka latettsü asoshi Naga Club-i jembi tenzük aser Naga National Council-i iba yimten temeten ken o aser khuretji belenzük aser NNC mapa dak temulung masü NSCN aküm aser parnokia kasa Naga yimten ken o aser khuretji koka raratsü merang saka parnokia mekoktet ser tang tashi Naga nungertemi küm noklangka jakdang Naga yimten temeja ka latettsü asoshi jembiba ken o tatembang ka mekümteti, Naga nung shisabolu aser terata tia nung lir. Aji oda, Naga nung yimten jenjang temeja ka lateter alima kintem den yaritepa alitsü melena, asenok tia majung, asenok rongnungang temulung melemtep, meputep aser telemsa adoka-adoka tapayutsü nisung taküma aika laluogo aser joko tangbo Naga yimten nüchiso bushir telok kobai kechi koma Naga yimten jenjang ka asoshi shirnok den kechi jembiar memeteti ka kümogo. Atangji, akhidang NNC mapangbo Naga Independence asüngbo arutsü ta imlaseta ata saka tanü NPGs zünger mezüngma aliba mapang yabo Naga Independence angutsübo meimlar. Ibaji Naga nung lanu aien ajak mulungjang aser Naga yimten tia asütsü. Iba ama mapang nung arogotem telungjemia kecha meshitet kümogo aser Nagaland government dak imlatsübo mali, kechiyong Nagaland government nung alirtem asoshibo Naga Independence dang nungibo taruba Indian election-ji tongtibangba lir. Iba ama mapang nung, Forum for Naga Reconciliation (FNR) teloki alima tesem balala nung NPGs purtem den Naga nung telungjem aser yimjung indang jemba arur, tang Nagaland nung tesem balala nung NPGs lenirtem dang masü saka Naga kintem lenirtem dena ayongloker Naga nung telongjem aser teputep nung yimten jenjang ka latettsü merangba mapa nung takok angutsü asoshi dang ajaki sarasadema nungittsüla. Iba nung ya Naga nungertem longjemer lenmang tasen ka piteta metukutetra, NSCN IM telokia 'Sovereignty' jenjang bener marutettsü aser surrender a masütsü aser NNPGs telokia Naga yimten nüchiso tatem küma melatettetsü aser surrender a masütsü, idangji Naga yimten temeten mali küma akoksatsü.

OLEMSABANG

OBALA KÜ JENOKDAK: Apijemtsü Shin 14:26

~ Mrs. Atula, Duncan Fellowship

(Iba ya DABA Tongtepratep Adok 156, January - July 2024 nung adokba ocet tazüngerterem ajangzükdaktsütsü bilema adoktsür).

English nung Sangro zülur William Wordsworth-i obala indang yamai shia lir, "Father to God himself we cannot give a holier name." Asen Tsüngrem dangjia Oba ta ajaba dang nungi tanga temeshiba tenüng ka maka. Oda tebu ka ta asübaji nüngja rongnung tajungtiba, tematiba aser temerükba ta asenoki ashitsü akok. Tsüngremi akhümtaket obala ka asütsü na yangluogo.

Tsüngrem tenüng sangang: kibong rangben asoshi jenokdak tajungtibaji obala lir. Jenokdak ta asübaya lendong timtem mapang mesüra tamakok, koda masüba mapang nung atsüka, kümzüka ayubaji lir. Aji oda ne tamang akhüm nung onoki jenoker.

Apijemtsü Shin 14:26, nung Tsüngrem oi yamai ashir, "Kibuba tsübuba nung temulung alemtsü tulu lir; aser par chirnur jenokdak akatsü." Oba na asoshi Kibuba tsübubaji mulung alemdak, ano Tsüngrem o jagi ashir Kibuba tsübubaji ne tashi (Anitet 15:2), aser na asoshi tashi tait mitsa (2 Sam. 22:23).

Obala na Kibuba nung tashi tait mitsa ka ama noktaka alibaji nür chirnur jenokdak tajungtibaji lir. Saka nai Kibuba nungi pila rongsen mesüra alima tashi mesüra ne status-ji dang ne teyimla kümdaktsüra, nai kodanga ner chirnur asoshi jenokdak tajungtibaji malangzüktettsü. Atangji Kibuba tsübubajisa jenokdak tajungtibaji lir ta Tsüngrem o jagi sayur.

Asenoki kodang Laishiba nungji reprangdangdir obalatem aika Kibuba tsübua Pa den jajaba angur, abenjagi par tamang akhüm nung kibong aser lokti ajonga jenokdak tajungtibaji liasü. Isreal chirtem ajak jenokdak tajung ka oda Yihusua ya liasü, shibai parnok Nangzüka lima jagi anir aru.

Yihusua ya Tanela agi sünga aliba tebu ka liasü (Taz.34:9). Tanela agi sünga aliba takümü - tezü tanga, jashia, tejak azülar mena malitsü. Parnok taküm circumstances nem manishidaktsür. Saka tia ajak nung Kibuba tashi nung pelaseta takümü alir. Watchman Lee-i yamai shia lir, "Inspiration originates with the spirit in one's life." Ne dak aliba tanela jagi ne sasa na ajongmesor: Tebu ka tanela nung teti küm küma alitsü asoshi peisasa ajongmesoba kanga tongtipang lir. Taküm aika tezü tanga azüla oatoker; saka tanela agi sünga aliba taküm peisasa dak nungi ajongmesoba adoker. Temeim obalatem tanela agi sünga kibong aniangmano.

Na tanela agi sünga melira azüla oadoktsü aser idangji mojingi ner kibong aser chirnur rakzüka bener oadoktsü. Tanelar tsüngsü ka ner kibong nung yangluteta dokjang aser iba tsüngsü kotak matong tashi alitsü. Alima rongsen aser temetetba rema aotsü saka Kibuba tsübuba, tanelar tsüngsü kodanga rema maotsü aser obaji ner chirnurtem asoshi jenokdak tajungtibaji lir.

Yihusua küm lir (40) tashi tamang melula Küm lir (40) tashi lisem lima taya aser tetzüra ajanga tongpang tesashi aika ajanga jaja saka tamangji melula. Isreal kin asoshi Tsüngrem sentong tulu atalokdaktsüba Yihusua liasü. Pa ya tajung bilemba aser tajung imlaba tebu ka liasü (he was an optimist).

Winston Churchill-i yamai ashi, "The pessimist sees difficulty in every opportunity. The Optimist sees the opportunity in every difficulty." Tamajungtem bilemba nisungi mapang tajung ajak nung tamakoktsü dang angur saka tajunglen bilemeri mapa tasak nunga teyimla angur aser takoktsü kümdaktsür.

Canaan latangi aortemi, oh ya khenyongi tamakoktsü ta shia nübor ajak tezü tanga jashidaktsü. Saka Yihusuaibo alimaji agidi ta ayongzü (Zün. 14:5ff). iba teyimla nung nübortem anir jajameso.

Asangsang nung nangzüka lima atong. Isreal nung lokti tuluji Yihusua dak jenoker nangzüka lima atong. Ajongtsü akodi, akoktsü akodi ta ajongmesoba olaji ner chirnur asoshi kanga tongtipang.

Kibong, Arogo aser lokti jenokdak tajungtiba Obala, Tsüngremi na moajang.

Obala kü jenokdak: Apijemtsü shin 14:26

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Zurich nung Arogo 13-i longjemer moapu nung tekülem sentong agi



Switzerland Federal Day of Thanksgiving, Repentance & Prayer anogomong nung Zurich nung Arogo 13-i longjemer moapu nung tekülem sentong agidang tangokba noksa nung angur.

September 28, 2025: September 21, 2025 nü Switzerland Federal Day of Thanksgiving, Repentance & Prayer anogomong nung Zurich nung Arogo 13-i longjemer tekülem sentong ka agi; iba sentong nungji Khristan 1,000 dak tema aden.

Turbinenplatz nung moapu nung ayongzükba tekülem sentongji ICF Zurich leniba nung agi aser kasa sentong nungji nisung 21 baptia liasü.

Denomination balala nungi Arogotem longjemer yimti aser linük atema sarasadem.

Iba sentong nungji jembidang Zoe Gospel Church nung pastor, Peter Hasler-i, "Asen yimtii sarasadem kanga nüngdaker," ta ashi.

Sentong ayongzükertemi ashiba agi, iba anogomong sentong nung tongtibangtibaji ajungbena aikati Khrista agizüka baptitsü melungtetba liasü.

C3Arogo nung pastor, Simon Spalinger-i, "Zurich yimti tiyongtsü nung anüng kübok tekülem sentong agiogo," ta metetdaksü.

Baptiba sentongji pastor Simon Spalinger-i ketdangsüa agia liasü.

Küm shia iba ansogomong nung moapu nung tekülem sentong agiba ya akhidang nungi benshia aruba sobaliba ka lir aser tesüiba küm ishika tsüngda Arogotem teimba-teimbai iba sentong nung shilem agia adener.

Buchegg Arogo nung pastor, Stephan Hörting-i, "Küm shia moapu nung tekülem sentong ayongzüka agia arudang Arogo teimba-teimbai shilem agia adenba atema pelar," ta ashi.

Salvation Army Zurich North nung pastor, Rebecca Zünd-i, "Zurich nung aliba Arogotemi longjemer tekülem sentong agia aruba ya telongjem temaitsü ka lir. Iba maongka agitetba atema

pelar," ta metetdaksü.

Federal Day of Thanksgiving, Repentance & Prayer ya küm shia September ita tasembuba Amongnü anogotem nung agia arur.

Pastor aser Lecturer, Emanuel Weiss-i onük jembiba mapang nung küm 400 tejaklen Zurich nung menoknok lendong tuluka atalokba sülen nisungtemi Tsüngremi parnok kümzükba atema tenüsang agüja sarasademtsü atema adenshiba metetdakja liasü.

Weiss-i, "Tanüa asenoki Tsüngrem dang sayatenya mapa inyakang ta mepishitsü akok. Kechiyong loktiliba melenshia aruaka Tsüngrembo kasa dang," ta ashi.

Sentong ayongzükertemi, tarutsü nungbo iba sentong nung nisung teimbai shilem agia dentettsüsa Zurich yimti tiyongtsü tesem ka nung ayongzüka agitsü, ta metetdaksü.

Church of Jesus Christ of Latter-day Saints Tir, Russell Nelson süogo



September 28, 2025: Church of Jesus Christ of Latter-day Saints nung lenir, Russell M Nelson alima nungi pilaogo; pa arrshi küm 101 liasü.

Nelson ya Utah nungi lir aser pa ya Church of Jesus Christ of Latter-day Saints (Mormon movement) nung Tir 17buba liasü.

Arogoi sangdong ka ajanga, September 27 aonung 10:00 ako meta pa süngjema amozüka ogo; pa anasa kinüngtsü Wendy Nelson liasü, ta metetdaksü.

"1984 küm April 7 nü Tir Nelson nem 'Tenyar' nüngja agüja liasü. 2018 küm January 14 nü pa Arogo nung Tir shima liasü," ta Arogoi metetdaksü.

"Pa ainkar inyakba mapangji alima nung ministry tulutiba rongnung ka ama züngshitsü

(pai linük 32 aser US territories sema liasü), Tenla ki aika (200) asü aser temelenshi tulu adokdakja liasü," ta Arogoi metetdaksü.

Arogo wadang inyakba dak alia Nelson ya temelungjang doctor ka liasü. Pa Arogo nung tenzükba mapang nung atsüapong kasa chirnurtem baptitsüba nokdangba densema temzüng tasen aika benoka liasü.

Pa melen Tir menden atema Dallin H Oaks shimtsüa akok. Oaks ya Arogo indang 'Quorum of the Twelve Apostles' nung züngsem tejentiba lir.

Arogo tangatetba nung, Church of Jesus Christ of Latter-Day Saints Tirtemji ainkartem ama züngshir. Tsüngremi mangdang sayuba nung ajemdaker Tiri counselors

ana aser 'Quorum of the Twelve' züngsemtem shisa agia Arogo lenir.

Nelson ya küm 12 tashi Quorum nung züngsem inyaka aruba sülen 2018 küm April ita nung 'senior apostle' shima liasü.

Pa Tir asüba mapang nung Amongnü tekülem sentongtem mapang tera tatsüba agitsü aser America nung masüba lenirtema governing body nung züngoktsü benoka liasü.

Russell M Nelson ya 1924 küm Salt Lake City, Utah, USA nung aso aser pa tainlonglong asüba mapang nung pai Mormon yimsü agizüka liasü.

Pa arrshi küm 22 asüba mapang nung medical doctor aküm aser US Army nung doctor inyaka liasü. Korean War mapang nung pa küm ana duty inyakba mapang pa captain liasü.

Pa rara nungi meyipa aruba sülen University of Utah nung Thoracic surgery Director inyak.

Pa mezüng Dantzel White den kibong aküm aser tena tanur 10 sosema lir. La 2005 küm asüba sülen 2006 küm pai Wendy Watson den kibong aküm.

ANOGO ABEN TSÜNGREM DEN

Mapa meranga inyaktsübaji lai tesayuba

Nisung kari mapa inyaktsü memolungra pa techiyungdaksü (II Thess. 3:10, b).

Mapa meranga inyaktsübaji Tsüngremer takangba aser tesayuba. Shibai 'ni Tsüngrem meimer' ta ashir, saka mapa meranga meinyaknür, parnok dangji shidakba Tsüngrem chirtem ta ajatsü makok. Nisung ka tetsüng teben shidak dang lir sürnung, mapa meinyaki chiyonga alitsübaji Laishiba-i kenyongi memelar.

Iba Lai tekong nung sayutsüngir Paul-i nenshia ashibaji, nisung ajaki pei tepok asoshi mapa meranga inyaktsüla ta ajungshir. Shirnoki azümesena mapa meinyaknür, parnokji mechiyungdaksütsüba indang yangi ashir. Nisung ajaki pei tepok asoshibosa inyaktsüla ta akanger. Kechiaser itemla azümasenba nisung ka jagi Tebu Tsüngrem atangji nung mekülemtettsü/ mamangtettsü aser Pai ashiba shidakji mebenshitetsü. Tsüngremer tenangzükba ozüngji aika dang lir. Shirnoki Pai ashiba angaa, Pa tsüngsü nung kümdanga jajar, parnok asoshi temoatsü jenti dang lir. Saka shirnoki pei tepok asoshi mapa inyaktsüa azümesena bilemer, parnok jagi Tsüngrem ozüng shidak benshitetsübaji tamakoktsü. Temesüng nunger shin o ka nung ashiba yamai ashir, "shiba mapa jenti aka, ano pa nemji mapa talila agüjang; shiba mapa maka pa nemji kecha mapa tagütsü, kechiaser pai kecha meinyaki toktsütsü". Yamaji shibai pei tepok-tebin asoshi mapa meranga inyaker, parnoki-ang Tebu Tsüngremjia tajungtiba aser atangji nung külemtettsü. Azümesener-i kima-yimtong nung keyi moka lir ta ashiba aser ano parnoki teka agi chi bener atutsüa-süng azümesena bilemba, aser asükwa yipten sübok nungi madoknüba Apijemtsü Shin kaket nung tejangja zülua lir. Azümesenertem asoshi tai aputsü onük aika dang lir. Parnoki kodanga tangar memenüptsü, yamaji Tsüngrem den-a itemla nübu jagi ochishia meja-jatettsü. Abenjiang ,yangi Pauli ashir, shibai pei tepok asoshi inyaktsü asoshi azümesener, parnokjibo kenyongi techiyungdaksü. Yamaji taküm nung yak-yak-a ali nung dang, alima aser tanüla tsütsü takoker taküm kaji sütettsü. Anungji mapa meinyaki chiyonga taküm linürtem aser Tsüngremi ashiba mangai pei sünütsü süa dang lir kodaki onürtemjibo, Tsüngremi aitsütsüsa ta iba Lai tekong nungi angazükdi.

Uganda nung Khristan yimsü agizüker ka par adianui tepset

September 28, 2025: Uganda Regional Referral Hospital-i anir ao, saka meküzmzükteti asü.

Iba tatalokba sülen Police-i Kairoki anogo aika bushi aser tesüsa Butaleja District nung puogo. Pa anema ken o benokogo aser tang Mbale City Police Station nung puoka lir.

Wasike asüpila sentong nung par kibong züngsem karibo tasü mang nungji kongshitsü memeulungi liasü. Pai Khrista agizükba ajanga pa mamanger ka kümogo, ta parnoki ashi.

September 8 nü Pastor Wabomba-i ketdangsüa asüpila sentongji agia liasü. Pastor-i, kinüngertemi anema nokdakyonga pai Khrista agizük, ta asür nem tenüngsang agütsü.

Uganda linük temzüng kübok tamangba yimsü melenshitsü densema yimsü temeden agüja lir, ajisüaka Islam yimsü toktsür Khristan yimsü agizükertem kinüngertemi sendoker mesüra tepseter. Talisa Muslim nütsüng aika aliba eastern Uganda nung Islam yimsü toktsür Khristan yimsü agizükertem aika tepsetogo.

AO OSHI ANGAZÜKDAK:**TANÜ ANGAZÜKTSÜBA OJANG****Tia****(n)** taküm nung ajung majung atalokba (luck)

* Kaketshirtem tia majung Assam nung timtem ajuru.

Tiasem**(v)** tia ajem, tiatop (destined for each other)

* Tiasem agidang nisung ana kibong küma alir.



Tir Yimyim

OLONG PAITEP # 7285

1		2		3		4	5			
				6						7
		8								
9				10		11				
			12						13	
						14				
16						17				

TIPLIN

1. Nisung jenti
4. Tsük rudenba
6. Temzüng tesashi
8. S___i
9. Nisung rongnung telemsa
10. Anogoshi
12. Ajanga aor
13. Tsük rizüngdak
14. Tebang nungi adokba
16. Süngdong tatembangtiba
17. Meputep

- (5)

- (5)

- (5)

- (3)

- (3)

- (4)

- (4)

- (3)

- (3)

- (5)

- (5)

LANGTSÜNGLEN

1. Tenük telong
2. Committee dang ajar
3. Yagi ki okdoker
5. Yim lenmang
7. Temoatsü keter meyipa aruba
11. Kanga junga menemba
12. Kenyongi majinü
13. Rong kanga tulu

- (9)

- (5)

- (7)

- (5)

- (9)

- (7)

- (5)

- (5)

OLONG PAITEP # 7284 TELANGZÜBA**TIPLIN :**

1. Aben, 4. Artsü, 7. Lisem, 8. Liwa,
9. Sarasadem, 12. Aket,
14. Mangu, 15. Anünü, 16. Ango.

LANGTSÜNGLEN :

1. Aruli, 3. Balala, 5. Suwar,
6. Belem, 9. Süjak, 10. Aonung,
11. Dokan, 13. Tinu.

NAI-A YA METETTER

Egypt nung nüngtugu melangteper Ashraf Mahrous-i pa tepo agi dang 700-ton rong ka tzüma nung atsür aruba ajanga alima otsü tasen ka yangluogo.

Ashraf Mahrous dang Kabonga ta ajar aser taküm küm tetenzüklen pai train ka atsü aser küm pezü tejakdang truck gari ka atsür aruteta liasü.

Arishi küm 44 tain Mahrous ya Ismalia nung alir aser Guinness World Records nungi rong atsüba kuli angutsü atar.

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Mizoram nung tantsütila Lalneihsangi arishi küm 108 nung asü

Aizawl, September 28, 2025

(Agencies): September 27, 2025 nikongdang Mizoram nung tantsütila Lalneihsang süogo. La arishi küm 108 liasü.

Nübertemi Lalneihsang dang temeim agi Pi Buangi ta aja aser Ebenezer Medical Centre, Aizawl nung yasung 7:55 ako meta la arishi tembang.

Lar kinungertemi Deobarnü la Khatla cemetery, Aizawl nung remogo ta osang ajanga

ashi.

September 13, 2025 nü Social Welfare Minister Lalrinpuii-i Mizoram nung tantsütilaji Pi Buangi ta sangokja liasü.

Pi Buangi ya Aizawl kübok Venghlui kiyong nung soa intet aser taküm April 14 nü la arishi küm 108 junga liasü.

Lai Behala Girls' Home, Kolkata nung mapa inyaker ka nung inyaker mezügbuba

Mizo nung naroküm angu.

Mizoram nung Salvation Army Church nung adener mezünpur kibongtem rongnung lar ka liasü. La tebu Thangchhunga-i Mizoram nung Salvation Army nung mezünpur Corps Sergeant Major inyaka liasü.

2022 nung Heritage organization-i Pi Buangi nem 'Women of Substance' award agüja liasü.



To avail Anganwadi services, beneficiary AADHAAR ENROLMENT & UPDATION is MANDATORY

SUPPLEMENTARY NUTRITION, PRE-SCHOOL NON-FORMAL EDUCATION, NUTRITION & HEALTH EDUCATION, IMMUNIZATION, HEALTH CHECK-UP, AND REFERRAL SERVICES.



Children aged 0-6



Pregnant women



lactating mothers

- Free Aadhaar enrolment for children below 5 years
- Free Mandatory Biometric Updation for 5-7 YO children
- MBU charges applicable for children 7 years and above
- Next MBU to be done between ages 15-17
- Mandatory Aadhaar updation every 10 years

Aadhaar enrolment centres are available in all ICDS Projects and the Directorate of the Department of Social Welfare



Gaza nung asür nisung 66,000 dak tema jungogo

Cairo, Rongjui/September 28 (Agencies): Israel aser Hamas na rara nung Gaza nung asür 66,000 dak tema jungogo, ta Gaza indang Health Ministry-i Deobarnü metetdaksü. Asürtem rongnung taoba ghonda 24 tsüngda mozükidangi bener arur parnok 79 densema lir, ta ministry-isa metetdaksü.

Ministry koba Hamas yimsüsüba küboki aiter, parnoki ashiba agi, 2023 küm October 7 nü Hamas puri Israel amakba sülen Gaza nung nisung 66,005 tepsetogo aser nisung 168,162 yiruogo.

Ministry yagi sepai aser civilian tem asüba bendanga osang magütsü, saka ashiba agi, asürtem rongnung

tesadangbo tetsür aser tanurtemliasü. Israel-i Gaza amaka tenzükba sülen tesem timba ajasaogo aser nütsünyongsük shilem 90 shi pei talidak ki toktsür jenshiaogo, aser iba ajanga timtem lendong tulu adokogo aser mongintemi ashiba agi Gaza yimti aya wara agi menepogo.

Hamas den sendaktepa liaka ministry indang data ya United Nations aser independent humanitarian experts temi shitak ta agizüker.

Israel-i tanen makai Gaza amakba mapang iba tesem nung asürtem timba küma odor.

Israel Ato Kilonser Benjamin Netanyahu-i Hokolbarnü United Nations

General Assembly (UNGA) nung o jembiba mapang October 7 nü Israel amakba lephsia jembi aser iba ya September 11 nü kiralongrartemi United States amakba den medemdanga jembia liasü.

Netanyahu-i, "October 7 sülenbo Jerusalem nungi mile ka pilar Palestine nungertem nem state ka agütsütsüji September 11 nü New York yimti nung mile ka pilar al-Qaeda nem state ka agütsüba den kasa lir," ta ashi.

"Iba ya matumalem mapa aser onoki minyaksü," ta Netanyahu-i ashiba den, anüolen aliba linüktemi Palestine ka state ka ama agizüksü jenjang agiba aija liasü.

Küm ter sülen Iran nem sanctions tanaben agütsür

New York, Rongjui/Sept. 28 (Agencies): Iran nuclear sentong dak sendakba nung linük balala den tezüngzüktep yanglua par nem tenokdangba agüja aliba agiener küm 10 sülen UN-i ano rongsenketzüng aser mitkar tsütsü tenokdangba aser temerenshi balala tanaben agütsür.

Küm ter jakdang iba tezüngzüktep yangluba nung shilem agia alir European linük asem - UK, France aser Germany - ajanga Iran-i nuclear nok-nü maneni yanglur aser amalitep makar ta tai tonglokja "snapback mechanism" amshia liasü.

June ita Israel aser US ajanga Iran indang nuclear sites aser mitkar aliba tesem kar amakba sülen Iran-i par nuclear facilities nung inspection memela, koba 2015 tezüngzüktep kübok inyaktsü shia lir.

Taoba hopta Iran Tir Masoud Pezeshkian-i nuclear nok-nü yanglutsü tebilemba mali ta nenshia shia liasü.

Tang tanaben benokshiba temerenshi ya tim masü, shidak masü aser özüng alema lir, ta Pezeshkian-i ashir, aser mapang talangka Islamist linük den anüolen linüktem tesendaktep mejungi arur 2015 küm iba tezüngzüktep yanglua aliba nung tebilemtsü tulu akumer.

Joint Comprehensive Plan of Action (JCPOA) yagi Iran indang nuclear installations, enriched uranium bendenba aser research agiba aser terenlok mapa nung temelaba tatakzük ya agütsür.

Iba tezüngzüktep nükjidong ya Iran nem nuclear power infrastructure yangluaka nuclear nok-nü meyangludaktsütsü asoshi lir.

2016 küm Donald Trump-i iba tezüngzüktep nungi US anizüker aoba sülen Iran-i nokdanga aliba nuclear maparen tali inyak tenzük.

kanga aitsü, koba pa jakdang US tir inyaka alisang Barack Obama mapang yanglu, aser tezüngzüktep tajungba yanglutsü nangzüka liasü.

US aser Israel-i June ita Iran indang nuclear facilities nung bomb pokloksüba ya par nuclear inyakyim raksatsütsü aser Israel dak tanen makai amakba 'regional proxies' nem nok-nü agütsüba yong temerenshi ka ama liasü.

Trump-ibo Iran nung nuclear oset yangluba tesemtem sashia raksatsüogo ta ashir, saka aikati temulung malemer.

June ita US aser Israel nati amakba ajanga tensa melenshitsüogo, ta Iran-i ashir.

Tang tashi iba tezüngzüktep nung aliba European linük temi jembishinüba ajanga tensa mokonga akumtsü imlar.

"Onoki Iran dang tensa tamajungba akumtsüsa mapa kecha meinyaktsü ajungshir. UN sanctions tanaben benokba ya diplomacy tatem masü," ta parnoki sangdong ka nung ashi.

UN General Assembly amentsü lia hopta tetenzüklen linük asem aser Iran jembishinü akaba nung iba tenokdangba benokba nung mapang atsülangtsüsa terenlokba meliasü.

Iran-i par teinyaktsü mapa aiben meinyakba yong iba 'snapback' yimya amshitsüsa akum, ta E3 indang foreign minister temi ashi.

Tanen makai mapang agia jembishinüaka Iran-i onok tebilemba bentettsü asoshi temulung agüja nüngdakba mapa meinyak ta ashi.

Tehran-i UN nuclear watchdog International Atomic Energy Agency (IAEA) den amalitep makar, ta parnoki jangja-jangja ashi.

"IAEA inspector temi Iran indang nuclear sites semdangtsü temelaba magütsü aser par indang 'high-enriched uranium' bendenba aliba osanga IAEA nem magütsü," ta

sangdong ajanga ashi.

Iran-i Deobarnü sangdong ka nung, özüng agi memelaba aser kuli shidak magütsüetba sanctions parnoki magizüker, ta ashi.

"Ozü nübur temeden aser tejangraba nung timtem agütsütsü nükjidong yur kechi inyakdir, yangji onoki telangzüba tapet agütsütsü, ta Iran foreign ministry ajanga ashi.

Pezeshkian-i mezüingbo Non-Proliferation Treaty nungi Iran ainshitsü amokmerena liasü, saka osü tera melenshia tenokdangba tanaben agütsüba ajanga jembishinü nung timtema alitsü ta ashi.

Nuclear enrichment sentong tali mekumdaktsütsü mechi Israel-i özü nuclear facilities nung mamaktsü ta tenangzükba tejangja Tehran-i nüngdaktsü, ta Iran tiri ashi.

US-i Iran dang enriched uranium bendenba aliba ajunga meshiba aser iba melen ita asem temerenshi magütsütsü ta ashiba pai aitsü aser, "Kechiba onoki iba ama sang nung onok ashitsü aser ita shia onok tekong nung lisü sendaktsü?" ta ashi.

Iran-i par nuclear sentong ya yimjung atema kisüng lir ta ashiba nung anüolen linüktem aser IAWA temulung melemteter.

Office of the
MOLUJUNGBA SEMCHIR
H.Q Longsa-798601

KHONANG TETUSHI AGUTSÜR

Ao Lima nung Longsa yimdak nungi Molujungba semchir Wb. Sangyumanen aser Wt. Temjenkala kibong nungi tetangshi kaketshisashir **Dr. Chubatoshi**-i "*Formation and Spread of Ao Naga Ancestral Sites: Oral Tradition and Archaeology*" nung Nagaland University nungi Ph.D degree ngutetba atema özü temulung nung masem pelaba kidong inti tenüng nung iba sabang nung lemsateper. Iba takok khonang ya kidong asoshi tang masü saka Naga nünger rangben asoshi lir. Teyanglur Tsüngremi Dr. Chubatoshi nem tarutsü anogotem nung Lanur jenti asoshi arangshi longzük ka aser shisatsü anetdak sanen tajung ka küma arishi anogotem talang moajangni ta sarasadema moatsür.



Sd/-
Nungsangtemshi, Tatar

Sd/-
L. Tushi Jr. (Gen Secy)

Russia-i drone aser missile amshia Ukraine amak

Kyiv, Rongjui/September 28 (Agencies): Russia-i missile

aser drone noklang aika amshia Deobar anepdang Kyiv aser Ukraine kübok tesem balala makogo, aser iba mapang nisung pezü tepseta liasü. Rara tenzükba sülen Deobarnü Ukraine yimtiba ya kanga sashia makogo.

Kidanger Poland-ia south len yimti ana anasa parnok indang airspace shibangtsü aser amokmerentem nem telangzüba agütsütsü asoshi jet tem yoka liasü.

Ukraine indang military-i ashiba agi, Russia-i drone 595 aser missile 48 yok aser parnok indang air defences-i drone 568 aser missile 43 khazüka yoka liasü. Military-isa, Russia indang target tongtibangtibaji linük yimtiba Kyiv liasü, ta ashi.

Tir Volodymyr Zelenskiy-i ashiba agi, Russia nungeri ghonda 12 dak tali tesem balala amak aser iba mapang cardiology clinic ka, factory tem aser nisung aliba kitem raksatsüogo.

Paisa, Ukraine amaktsü atema energy ayokba nungi rongsen aazükba nokdangtsü atema alima kintem ayongzükogo. Moscow nem tenokdangba talila agütsütsü atema Ukraine-i US tir Donald Trump memesüzükteti arudar.

"Telangzüba tesashi ka agütsütsü atema mapang talangka agir aser onoki United States, Europe, G7, aser G20 nungeri telangzüba tesashi agütsütsü imla atar," ta pai

Telegram messaging app ajanga ashi.

Deobar anepdang Kyiv nung alirtem bomb apokba aser anüng nung drone tem yimzüba ola angashia sak. Yimti nung air raid alert ola agütsüba ghonda tenet shi sülen 9:13 nung anena liasü.

Reuters osangbenertemi Kyiv tezülen tesemtem semdang, kong tawa yangluba ki taren ana ajasa raksa aliba, aser iba anasa anenden aliba garitema matemer aliba nguogo.

Iba tesem nung alirtem bomb apokba tashi agi parnok indang kichibatem ajak poksatsüba sülen pei talidak ki toktsür aotsüsa aküm aser karbo teküzmükba bushia ali telung nung yanglur aliba metro station temi jena oa liasü.

Zelenskiy-isa, north, centre aser south lena tesem aika makogo aser south len Zaporizhzhia yimti nungho nisung 16 tashi yirua liasü, ta metetdaksü.

Zaporizhzhia nung ki aika raksar mi adoka aliba video tem social media nung post balala ajanga sayuogo.

Emergency service temi ashiba agi, lendong nung linük kübok tesem balala nung nisung pezü asü aser nisung 67 yiruba local ketdangsürtemi metetdaksüogo.

Asürtem rongnung arishi küm 12 tain tetsür chanu ka densema lir, ta Kyiv indang military administration tekolakba Tymur Tkachenko-i Telegram ajanga metetdaksü.

Cape Town, Sept. 28, 2025 : Gaza nung aliba nüburtem bhukuma Cape Town, South Africa nung nüburtem yimtung süa jajadang tangokba noksa nung angur. Gaza nung Israel mitkari amakba asoshi sorkar dang telangzüba tesashi agütsütsü khanga iba sentong ya Honibarnü ayongzüka liasü.

Nuno Espirito Santo West Ham coach kümogo



Nuno Espirito Santo

Rongjui/September 28, 2025 (Agencies): Honibarnü Graham Potter mapa nungi anentsüba sülen ghonda ishika dang lir West Ham-i kanga kar jenjang agia Nuno Espirito Santo club indang coach asütsü shimogo.

Portugal nunger coach ya iba season tetenzüklen Nottingham Forest puri mapa nungi anentsür liasü, aser pai tang West Ham den küm asem atema tenangzüktepba yangluogo aser pa lenisüba nung par team mezüngbuba Hombar aonung Everton nung oa asayatsü.

West Ham puri season junga metenzükteti Premier League nung parnok bonglanglen nungi tanabuba jenjang nung aliba mapang Potter ya mapa nungi anentsütsü imla liasü. Arishi

küm 49 tain coach yagi tan season nung league asaya pongu nungi point asem dang ngutet aser League Cup nunga Wolves pur mekoki tsükogo.

"Toba season tanabuba shilem aser 2025/26 season tetenzüklen result aser asayaba yimya ya imlaba ama masü asü," ta club sangdong ka ajanga ashi.

Tottenham goal 3-0 agi makokba den taoba hopta tatemi kidang Crystal Palace makokba sülen Potter ya mapa nungi anentsütsü imla liasü. January ita Julen Lopetegui melenba sülen Potter lenisüba nung West Ham pur asaya 25 asaya saka trok dang akok.

"Ni West Ham United Football Club toktsüba atema kanga tezü adanger. Result

majung ta ni agizüiker," ta Potter-i ashi.

Arishi küm 51 tain Nuno-i iba East London club coach mapa agizükba atema nema danga bilemba lemsatepogo.

"Ni idaki aruba atema kanga pelar aser West Ham United tenüng nung nokdatsü atema nema danga bilemer. Kü nikjidongji meranga inyaksü, team takokba tashi tajungtiba asayadaksütsü aser takok tashi toktepba asayatsü asoshi lir," ta pai ashi.

Taoba mapang Wolves aser Tottenham coach ya taoba season nung Forest nung kanga junga inyakogo, aser pai parnok jenjang tentbuba tashi aniba den küm 30 tsüngda mezüngbuba European campaign nung asayatsü atema maongka nguteta liasü. Ajisiüaka asayar alizükba aser ayokba dak sendakba nung club kibur Evangelos Marinakis den mangatettep adokba sülen pa iba ita tetenzüklen mapa nungi anentsü.

Nuno yagi Wolves pur Premier League nung team tajung ka küma anitetogo aser parnok Europa League nunga quarter-final tonga asayaogo, ajisiüaka pa Spurs nungbo junga minyakteti asaya 17 sülen mapa nungi anenja liasü.

Mithun Manhas BCCI tir asütsü shimogo



Mithun Manhas

Rongjui/September 28, 2025 (TYO): Taoba mapang Delhi captain Mithun Manhas, Deobarnü Annual General Meeting (AGM) nung Board of Control for Cricket in India (BCCI) tir asütsü shimogo. Arishi küm 45 tain Manhas ya board indang tir 37buba kümogo aser pai Roger Binny melenogo, shiba küm 70 ajungba sülen taoba ita mapa nungi anenogo.

Iba ita tetenzüklen BCCI nung tongtimbang telemtetba agirtem informal senden ka amenba sülen Manhas ya shimtsü imla liasü. Pa indang nomination ya Jammu & Kashmir Cricket Association (JKCA)-ia kanga ajanga nongitogo. Manhas ya asaya aliba mapang domestic cricket nung kanga tongtimbang asayar ka liasü.

Taoba mapang middle-order batter ya 1997-98 aser 2016-17 tsüngda first-class asaya 157, List A asaya 130 aser IPL asaya 55 nung asayaogo. Iba mapang pai first-class run 9,714 yanglu aser pa indang average 45.82 liasü. Paisa, century 27 aser 49 half-century 49 yanglu aser ball aonba nunga teyari

agütsüogo. Pa atema tajungtiba season ji 2007-08 season liasü aser iba mapang pai run 921 yanglua Delhi team-i Ranji Trophy akokba nung teyari tulu agüja liasü.

Maneni Manhas IPL nunga Delhi Daredevils, Pune Warriors India, aser Chennai Super Kings nungi asayaogo aser iba mapang asaya 55 nung pai run 514 yanglua liasü. Asaya nungi anenba sülen pa cricket asaya nungi mepelai coach aser administrator ama inyaka aruogo. Pa ya tesüngjem nisung ka aser grassroots nung terenlok atema rangloker inyakba nisung ka lir.

Manhas shimba sülen pa ya Sourav Ganguly aser Roger Binny na sülen iba mapang abentsü atema shimba taoba mapang cricket asayar rongnung tasembuba kümogo.

Pa shimba indang jembiba mapang Union Minister Dr. Jitendra Singh-i iba anogo ya Doda atema tongtimbang anogo ka lir ta ashi. Manhas ya Doda nungi jakzüka aruba lir, koba Jammu & Kashmir kübok kinük nung aliba district ka lir.

Nepal-i West Indies koka tang mezüngbuba full ICC züngsem ka kokogo



Rongjui/September 28, 2025 (Agencies): Nepal cricket team-i international T20 cricket nung alizüng tasen ka tongteta Honibarnü Sharjah Cricket Stadium nung West Indies team run 19 agi kokogo.

Iba asaya akokba ya Nepal asoshi International Cricket Council (ICC) indang full member nation ka tang mezüngbuba akokba lir aser iba asayamung nung parnok 1-0 agi tejakdang kümogo.

Asaya nung West Indies-i toss akok aser mezüng bowling aontsü shim. Parnoki over 20 nung Nepal nem asayar 8 out sür run 148 dang yangludaksü.

Mezüngbuba batting amenba sülen Nepal nunger opener Kushal Bhurtel (5) aser Aasif Sheikh (3) na kanga kara out süatok aser run 12 nung

asayarbo ana out süatoker liasü. Ajisiüaka captain Rohit Paudel (run 38; 35 balls), Kusal Malla (run 30; 21ball), aser Gulsan Jha (run 22; ball 16) nunger asaya jenjang yanglushia liasü.

West Indies nunger bowler tem rongnungi Jason Holder-i ball tajungba ona pai run 20 agütsür wicket 4 agi. Navin Bidaisee-ia, kanga tongtimbang asayar Paudel aser Malla na densema run 29 agütsür wicket 3 agia liasü.

Run arishiba mapang West Indies-i asaya junga metenzüktet aser Kyle Mayers run pongu dang yanglur Kushal Bhurtel-i run out sütsü. Parnok batter temi asaya aziüoka masayatet aser mapangshia asayartem out süa liasü.

West Indies nunger batsmen tem aikati asaya junga tenzük

saka run telong junga meyangluteti out süatok. Amir Jangoo (19), Ackeem Auguste (15), Keacy Carty (16), aser Navin Bidaisee (22) nunger ajaki run junga meyangluteti out asü.

Asaya tatemi Fabian Allen (run 19; ball 14) aser captain Akeal Hosein (run 18; ball 9) nati meranga asayadang saka parnoki over 20 nung run asayar 9 out sür run 129 dang yanglua run 19 agi asaya makok.

Iba asayamung nung tanabuba asaya September 29 nü kasa tesem nung asayatsü. Iba asaya nung West Indies nunger teti asayartem aika densema maliasü.

Nepal nunger bowler tem rongnungi Kushal Bhurtel-i run 17 agütsür wicket 2 agia team nem teyari tulu agütsüogo.

Amita Sharma tetsür team chief selector asütsü shimogo

Mumbai, Rongjui/September 28 (Agencies): Taoba mapang India tetsür team nung cricket asayar Amita Sharma, India tetsür national team chief selector asütsü shimogo, ta Board of Control for Cricket in India (BCCI)-i Mumbai nung Annual General Meeting (AGM) amenba mapang sangdongogo.

Amita shiba India team nungi Test pongu aser One-Day Internationals (ODIs) 116 nung asayaogo, lai tajangshiba aika bena lir aser asayartem shitsü atema iba mapang asoshi la kanga tapet asütsü ta amanger.

Women's selection panel tasenba nung la den ano taoba mapang India team nungi asayar Shyama Dey, Sulakshana Naik, Jaya Sharma, aser Sravanthi Naidu nungera densema lir. Parnok ajaki India tetsür cricket asaya nem teyari



tulu agütsüogo.

Kasa mapang nung taoba mapang India team nungi asayar Pragyan Ojha aser RP Singh nata senior men's national selection committee züngsem asütsü shimogo. Tenati S. Sharath aser Subroto Banerjee na melenogo.

Kasa mapang nung Kerala Cricket Association tir Jayesh George, mezüngbuba Women's Premier League (WPL) mendenbuba asütsü shimogo.

BILEMDANGANG

"Na kong tepela sama iba tesem jagi meyipa tuo."